

Na osnovu člana 28. stava 1. tačka 7. Statuta Plivačkog saveza Bosne i Hercegovine (u daljem tekstu: PS BiH), Upravni odbor PS BiH (u daljem tekstu: UO PS BiH), na sjednici održanoj 18.02.2017., d o n o s i

PRAVILNIK O REGISTRACIJI KLUBOVA I PLIVAČA/ICA, TRENERA I SUDIJA U PS BIH

Osnovne odredbe

Član 1.

Pravilnik o registraciji članova PS BiH (u daljem tekstu: Pravilnik) propisuje uslove i način registracije članova PS BiH u svrhu regulisanja njihove aktivnosti i prava nastupa i učestvovanju na organizovanim takmičenjima u plivanju na teritoriji Bosne i Hercegovine (u daljem tekstu: takmičenjima).

Član 2.

Ovaj Pravilnik primjenjuje se na sve članove PS BiH, udružene članice Plivački savez Federacije BiH (u daljem tekstu: PS F BiH), Plivački savez Republike Srpske (u daljem tekstu: PS RS), sve plivačke klubove i njihove članove-aktivne takmičare, plivačke trenere, plivačke sudije i ostale plivačke radnike i zvaničnike.

Svi plivački klubovi koji egzistiraju pod okriljem PS F BiH i PS RS, treneri, sudije, i ostali plivački radnici moraju biti registrovani u PS BiH.

Samo članovi PS BiH koji su registrovani u skladu sa odredbama ovog Pravilnika stiču pravo nastupa i učestvovanja na takmičenjima.

Član 3.

U Kancelariji PS BiH, kojom rukovodi generalni sekretar, vodi se evidencija pod nazivom: Evidencija članova PS BiH, jedinstvena za sve članove, i posebna za svaku vrstu članova (Evidencija članica, Evidencija klubova, Evidencija plivačkih trenera, Evidencija plivačkih sudija, Evidencija službenih osoba u plivanju-zdravstvenih radnika,...). Sastavni dio ovih evidencija jesu svi dokumenti koji se tiču vrste evidencije, te su pohranjeni u posebnim registratorima.

Član 4.

Svi članovi PS BiH (PS F BiH za klubove iz Federacije BiH, PS RS za klubove iz Republike Srpske, registrovani plivači/ice preko klubova na ime PS BiH, plivački treneri, plivački sudije, druga službena lica u plivanju...), plaćaju redovnu godišnju članarinu prema PS BiH.

Visinu godišnje članarine utvrđuje UO PS BiH, jedinstvenom Odlukom o visini članarina, taksi, kazni, naknada i drugih davanja.

Član PS BiH koji ne izmiri na vrijeme svoju članarinu, u roku koji je određen, neće imati pravo nastupa na takmičenjima, a protiv istog će biti pokrenut disciplinski postupak.

REGISTRACIJA ČLANOVA PSBIH

Član 5.

U PS BiH se vodi Registar plivača/ica i članica PS BiH (u daljem tekstu: Registar). Uvođenje u Registar vrši se na osnovu pisane prijave-spiska:, udruženih članica PS BiH (PS F BiH i PS RS).



U PS BiH se vodi Evidencija plivačkih trenera i plivačkih sudija, te ostalih plivačkih radnika, po potrebi. Upis u evidenciju vrši se putem i na prijedlog PS F BiH i PS RS, uz spisak, ili direktno putem kancelarije PS BiH.

Član 6.

Potvrde registracije i registraciju članica PS BiH i plivača/ica, trenera i sudija obavlja registracioni organ PS BiH.

Registracioni organ PS BiH je generalni sekretar PS BiH.

Članice, PS F BiH i PS RS vrše registraciju plivača/ica i klubova, te izdaju takmičarske legitimacije za plivače/ice.

Članice, PS F BiH i PS RS, određuju registracioni organ u skladu sa svojim normativnim aktima.

Član 7.

Zahtjev za prvu registraciju, produženje postojeće registracije, preregistraciju i obnovu registracije, te kopija takmičarske legitimacije, predaju se u Kancelariju PS BiH, u roku propisanom ovim Pravilnikom.

Prva registracija i obnova registracije članica PS BiH i plivača/ica nije vremenski uslovljena. Prva registracija plivača/ica vrši se prilikom učlanjenja plivača/ica u klub, obnova registracije vrši se prilikom ponovnog učlanjenja u klub.

Produženje registracije plivača/ica, od strane udruženih članica, vrši se svake godine u vremenu od 21.-30.septembra za narednu takmičarsku sezonu, i važi za period od 01.oktobra tekuće godine do 30.septembra naredne godine.

Za članice PS BiH i plivače/ice zahtjev za prvu registraciju, produženje postojeće registracije, preregistraciju, obnovu registracije, te dostavu kopije takmičarske legitimacije, podnosi ovlašteno lice (sekretar) članice, PS F BiH ili PS RS.

Zahtjev za prvu registraciju kluba podnosi ovlašteno lice članice (PS F BiH ili PS RS).

Zahtjev za prvu registraciju trenera, te obnovu iste svake godine, podnosi klub u kojem trener obavlja djelatnost, preko matičnog saveza, PS F BiH ili PS RS, ili lično, ukoliko nije angažovan u nekom klubu.

Klubovi su obavezni izvršiti registraciju trenera koji rade sa plivačima/icama.

Zahtjev za prvu registraciju plivačkog sudije, te obnovu iste svake godine, podnosi plivački sudija lično, preko Sudijske komisije PS F BiH ili PS RS.

Svi klubovi koji egzistiraju na teritoriji Bosne i Hercegovine moraju biti registrovani u članicama (PS F BiH i PS RS) i u PS BiH.

Članovi klubova koji nisu registrovani u PS BiH nemaju pravo zvaničnog nastupa u konkurenciji na takmičenjima.

Član 8.

Nakon pozitivno riješenog zahtjeva za izdavanjem prve registracije, Kancelarija PS BiH je dužna novoregistrovanom članu potvrditi njegov jedinstveni registracijski broj izdat od strane udružene članice, uz naznaku PS BiH.

Potvrda o prvoj registraciji, produženju registracije, preregistraciji, obnovi registracije članice PS BiH i plivača/ica, plivačkog trenera ili plivačkog sudije, izdaje se u pismenoj formi najkasnije u roku od petnaest (15) dana od dana prijema zahtjeva za registraciju. Potvrda može biti zbirna ili pojedinačna.

U roku iz predhodnog člana, 15 dana od isteka prijelaznog roka, plivač/ica može nastupati za novi klub, u slučaju prelaska iz kluba u klub, a rezultat postignut u tom periodu priznat će se u slučaju da je zahtjev za preregistraciju pozitivno riješen od strane registracionog organa PS BiH. U slučaju da je iz bilo kojeg razloga zahtjev za potvrdu preregistracije ili za preregistraciju, odbijen, rezultati postignuti u tom periodu za novi klub, neće biti priznati.



Član 9.

Po odredbama ovog Pravilnika mogu se registrovati i oni pojedinci koji ne pripadaju niti jednom od plivačkih klubova udruženih u članice PS BiH, ali samo uz posebno dopuštenje UO PS BiH, kao drugostepenog registracionog organa, na predhodni zahtjev zainteresovanog pojedinca.

Uz uslov dobijanja registracije od strane UO PS BiH ovakvi pojedinci stiču pravo nastupa i učestvovanja na takmičenjima bez ikakvih ograničenja u odnosu na ostale registrovane članove, te pod znakom PS BIH.

Pozitivno rješenje registracioni organ izdaje ovakvim pojedincima nakon što ispune sve uslove propisane odredbama ovog Pravilnika.

Član 10.

Zahtjev za registraciju kluba ili plivača/ice, plivačkog trenera ili plivačkog sudije, podnosi se najprije prema PS F BiH ili PS RS, koji je nakon provjere uslova dužan u roku od 7 dana isti prosljediti prema Kancelariji PS BiH.

Svaki klub, ili pojedinac u plivačkom sportu na području Bosne i Hercegovine, mora biti registrovan za matični plivački savez/članicu PS BiH, te po ispunjenju tih uslova može biti registrovan za PS BiH, čime stiče pravo nastupa na takmičenjima.

Ukoliko klub ili pojedinac nije član jedne od članica PS BiH, ili nije član PS BiH, nema pravo nastupa na takmičenjima, niti pravo nastupa za plivačku reprezentaciju BiH.

Član 11.

Zahtjev za prvu registraciju kluba sadrži:

-pismeni zahtjev sa slijedećim podacima: Naziv i adresa, datum osnivanja, žiro račun, matični broj, JIB (Jedinstveni identifikacioni broj), lica ovlaštena za zastupanje.

-ovjerena kopija odluke o osnivanju,

-Ovjerena kopija rješenja o upisu u sudski registar

-zapisnik sa osnivačke skupštine

-Kopija statuta

-Potvrda o uplati takse za registraciju (po odluci UO PS BiH).

Zahtjev za prvu registraciju Kluba nije vremenski uslovljen.

Zahtjev za produženje registracije kluba sadrži:

-Pismeni zahtjev sa slijedećim podacima: Naziv i adresa, datum osnivanja, žiro račun, matični broj, JIB, lica ovlaštena za zastupanje,

-Potvrda o uplati takse za produženje registracije.

-Dokaz o statusnoj promjeni ukoliko je do iste došlo u proteklom registracionom ciklusu (statusne promjene).

Klubovi zahtjev za produženje registracije moraju podnijeti svake godine do 31.01.

Registracioni organ PS BiH dužan je do 15.02. izdati potvrdu o produženju registracije.

O produženju registracije staraju se registracioni organi udruženih članica, po službenoj dužnosti.

Klubu koji ne izvrši produženje registracije, prestaje članstvo u PS BiH, kao i svim njegovim članovima.

Član 12.

Zahtjev za prvu registraciju plivačkog trenera i plivačkog sudije sadrži:

-Pismeni zahtjev sa slijedećim podacima: ime, ime jednog roditelja, prezime, datum i mjesto rođenja, JMBG, datum početka obavljanja sudijskim ili trenerskim pozivom,

-Ovjeran rodni list,

-Dokaz o stručnoj spremi, ovjerena kopija,

-Dokaz o položenom sudijskom ispitu-za sudije, ovjerena kopija,

-Dokaz o trenerskoj edukaciji (ako je posjeduje) , ovjerena kopija,

-Potvrda o izvršenoj uplati takse,

-Uvjerenje o državljanstvu,



-Biografija sa bitnim podacima iz bavljenja trenerskim ili sudijskim pozivom
Zahtjev za prvu registraciju plivačkog trenera ili plivačkog sudije, nije vremenski uslovljen.

Zahtjev za produženje registracije plivačkog trenera ili sudije sadrži:

-Pismeni zahtjev sa slijedećim podacima: ime, ime jednog roditelja, prezime, datum i mjesto rođenja, JMBG, datum prve registracije,

-Potvrda o izvršenoj uplati takse,

-Dodatni dokumenti koji nisu predati prilikom prve registracije ili su stečeni novi dokazi koji govore o stručnosti i profesionalnom napredovanju.

Svaki plivački trener ili plivački sudija pismeni zahtjev za produženje registracije moraju podnijeti registracionom organu PS BiH do 31.01. Zahtjev podnose lično, ili preko matičnog kluba ili udružene članice. O produženju registracije staraju se registracioni organi udruženih članica, po službenoj dužnosti.

Registracioni organ PS BiH dužan je u roku do 15.02. izdati potvrdu o produženju registracije.

Svaki plivački trener, ukoliko promijeni klub u kojem radi, dužan je u roku od 7 dana, dostaviti pismenu obavjest Kancelariji PS BiH, preko matičnog saveza. Obavjest treba da sadrži ime predhodnog kluba, te naziv novog kluba, datum prelaska i naziv pozicije koju će obavljati u novom klubu.

Svaki plivački sudija ili plivački trener ukoliko prestaje sa angažmanom u plivanju, mora u roku od 15 dana o istom obavjestiti registracioni organ, preko PS F BiH ili PS RS. Po dostavljenoj obavjesti isti se skida sa liste evidencije koju vodi PS BiH. Ponovna registracija je moguća.

Član 13.

Potvrda o registraciji izdaje se najkasnije u roku od petnaest (15) dana od dana prijema prijave za registraciju. Jedan primjerak potvrde o registraciji čuva se u arhivi PS BiH uz Registar.

U slučaju da dva kluba iz istog mjesta podnesu zahtjev za registraciju pod istim imenom, u Registar će se upisati naziv kluba čiji je zahtjev ranije podnesen.

Član 14.

Protiv svake odluke o registraciji člana PS BiH može se uložiti prigovor, ako se smatra da su prilikom donošenja odluke o registraciji prekršene odredbe Statuta PS BiH, i / ili pravila ovog Pravilnika.

Prigovor se podnosi preko Kancelarije PS BiH, u roku od osam (8) dana od saznanja o izvršenoj registraciji koja se osporava. Registracioni organ može, ukoliko ocijeni da je prigovor utemeljen, svoju odluku preinačiti u korist podnosioca prigovora.

Odluku o prigovoru donosi UO PS BiH, na prijedlog registracionog organa, u roku od 15 dana, od dana podnošenja prigovora.

Odluka UO PS BiH o prigovoru je konačna.

REGISTRACIJA PLIVAČA/ICA

Član 15.

Za registraciju plivača/ice klub je, preko PS F BiH ili PS RS, dužan dostaviti registracionom organu PS BiH:

-Pismeni zahtjev sa spiskom plivača sa slijedećim podacima: ime, ime jednog roditelja i prezime, datum i mjesto rođenja, JMBG, datum sa kojim je registrovan u Klubu,

-Ovjerenu kopiju ili original rodnog lista,

-Dvije fotografije (ne starije od 6 mjeseci),

-Potvrda o izvršenoj uplati takse za godišnju članarinu,

-Uvjerenje o državljanstvu BiH,

-Kopija takmičarske legitimacije

-Dokaz o školovanju ili boravku u BiH (za strane državljanke).



Za produženje registracije plivača/ice klub je, preko PS F BiH i PS RS, dužan dostaviti Komisiji:

- Pismeni zahtjev za produženje registracije sa spiskom plivača i podacima za svakog plivača sa spiska: ime, ime jednog roditelja, prezime, datum i mjesto rođenja, JMBG, datum početka članstva u klubu, datum zadnje registracije,
- Jedna fotografija (ne starija od 6 mjeseci),
- Potvrda o uplati takse za produženje registracije.

Kod prelaska pojedinog člana iz jednog kluba u drugi, udružene članice Kancelariji PS BiH dostavljaju:

- Zahtjev za preregistraciju sa podacima: ime, ime jednog roditelja, prezime, JMBG, naziv kluba iz kojeg odlazi, naziv kluba za koji se registruje,
- Jedna fotografija (ne starija od 6 mjeseci),
- Ovjerena ispisnica ranijeg kluba, a ako nije izdata, onda potvrda o podnesenom zahtjevu za izdavanje ispisnice, te izjavu od članice (PS F BiH ili PS RS) zašto ispisnica nije izdata,
- Potvrda o predhodnoj registraciji sa naznačenim datumom zadnje registracije i registracionim brojem, a ako nije izdata, potvrda o podnesenom zahtjevu za izdavanje potvrde o predhodnoj registraciji, ili kopija takmičarske legitimacije.

Član 16.

Nakon završenog procesa registracije kod matičnog saveza, PS F BiH ili PS RS, registrovanom plivaču/ici izdaje se takmičarska legitimacija od strane matičnog saveza.

Ispravna takmičarska legitimacija služi takmičaru kao dokaz članstva za pravo nastupa i identifikaciju na takmičenju i bez nje ne može da nastupi na takmičenju. Ista može biti zatražena na uvid od strane delegata takmičenja.

Izgled takmičarske legitimacije, i potrebne dokumente, utvrđuju PS F BiH i PS RS.

Član 17.

Plivač ne može biti registrovan u isto vrijeme za dva kluba u BiH. Plivač ne može biti registrovan u isto vrijeme za klub van BiH i za klub u BiH. Dvojna registracija nije moguća, osim u slučajevima iz člana 23. stav 2. ovog Pravilnika . Plivač može biti registrovan samo za jedan klub u BiH, ili za samo jedan klub van BiH u slučaju da se registruje direktno kao član PS BiH.

Član 18.

Plivač/ica ima pravo na promjenu kluba u prijelaznim rokovima, i uslovima iz ovog Pravilnika.

Pravo iz stava 1. ovog člana plivači/ice mogu ostvariti u dva vremenska intervala:

-od 01.09. do 30.09.

-od 01.04. do 20.04.

Pod prijelaznim rokom smatra se period od prvog dana početka prijelaznog roka, do krajnjeg roka trajanja prijelaznog roka, kada sva potrebna dokumentacija treba biti dostavljena registracionom organu PS BiH. U tom periodu čitav proces, podijeljen u tačno određene i definisane etape, mora biti završen dostavom potrebne dokumentacije registracionom organu PS BiH.

Član kluba može promijeniti klub samo unutar propisanog prijelaznog roka i u skladu sa odredbama ovog Pravilnika.

Plivač/ica može promijeniti klub samo jednom u kalendarskoj godini.

Član 19.

Zadnji dan za podnošenje zahtjeva za izdavanje ispisnice je 10.septembar tekuće godine, za prvi prijelazni rok, odnosno 5.april slijedeće godine, za drugi prijelazni rok.

Klubovi su dužni izdati ispisnice zaključno do 20.septembra tekuće godine, za prvi prijelazni rok, odnosno 10. april slijedeće godine, za drugi prijelazni rok.



Zahtjevi za prelazak iz kluba u klub, uz svu potrebnu dokumentaciju, od strane udruženih članica, moraju biti dostavljeni u Kancelariju PS BiH do 30.09. za prvi prijelazni rok, odnosno do 20.aprila, za drugi prijelazni rok.

Registracioni organ PS BiH dužan je odmah utvrditi ispravnost zahtjeva iz predhodnog stava, te ukoliko je ispravan, zahtjev za registraciju potvrditi i obavjest o istoj što prije dostaviti zainteresiranim stranama.

Da bi zahtjev za prelazak iz kluba u klub bio valjan u smislu ovog Pravilnika, te da bi bio podoban za potvrdu registracije od strane registracionog organa PS BiH, moraju biti kumulativno ispunjeni svi uslovi iz stava 1., 2. i 3. ovog člana. Ukoliko jedan od uslova nije ispunjen, ili je narušen jedan od postavljenih rokova iz stava 1., 2 i 3. ovog člana, zahtjev za prelazak iz jednog u drugi klub biće odbijen, te plivač/ica nemaju pravo nastupa na takmičenjima za novi klub sve do narednog prijelaznog roka.

Klub organizator takmičenja koji dozvoli nastup plivača/ice koji nisu registrovani u skladu sa odredbama ovog člana kaznit će se novčanom kaznom od 1.000,00 KM (jednahiljada konvertibilnih maraka), i suspenzijom sa narednih takmičenja u trajanju od šest (6) mjeseci od dana izrečene mjere.

Klub koji napravi prekršaj iz predhodnog stava ne može biti prijavljen niti za jedno državno prvenstvo, FINA ili LEN takmičenje u narednih godinu dana, od dana izrečene mjere.

Član 20.

Klubovi su dužni izdati ovjerenu ispisnicu i potvrdu o ranijoj registraciji ili takmičarsku legitimaciju, u roku od 7 dana od dana podnošenja zahtjeva za ispisnicu. Pravo nastupa za drugi klub stiće se samo u prijelaznim rokovima predviđenim ovim Pravilnikom.

U slučaju da klub ne izda ispisnicu i/ili potvrdu o predhodnoj registraciji razlog neizdavanja mora pismeno obrazložiti i dostaviti u Kancelariju udružene članice PS BiH u roku 7 dana od dana podnošenja zahtjeva ili će se smatrati da je ispisnica i potvrda o predhodnoj registraciji uredno izdana. Udružena članica dostavlja obavjest kancelariji PS BiH.

Nakon podnošenja zahtjeva za ispisnicu, plivač može nastaviti trenažne procese u drugom klubu, ali do donošenja konačne odluke o preregistraciji, na plivačkim takmičenjima može nastupati samo pod svojim imenom, van konkurencije.

Upravni odbor, na prijedlog registracionog organa, odlučuje u slučaju da klub ne izda ispisnicu, a dostavi razlog neizdavanja u propisanom roku, te cijeni opravdanost neizdavanja ispisnice i donosi odluku o registraciji u roku najkasnije do kraja intervala trajanja prijelaznog roka, a odluka mora biti dostavljena svim stranama odmah, isti dan po donošenju na službeni mail kluba, ili zaniteresovanog lica. Nezadovoljna strana odlukom registracionog organa, može izjaviti prigovor UO PS BiH u roku od 3 dana. UO PS BiH dužan je u roku od 3 dana riješiti prigovor na odluku registracionog organa. Odluka UO PS BiH je konačna.

Član 21.

Prestankom članstva u klubu, osim u slučajevima prelaska iz kluba u klub tokom prijelaznog roka, plivaču/ici prestaje da važi registracija u PS BiH, a time i pravo nastupa na takmičenjima.

Pravo nastupa za novi klub, može steći ponovno, u slijedećem prijelaznom roku, uz postupak predviđen za prvu registraciju.

Plivaču/ici koji uopšte nije nastupao na takmičenjima najmanje 365 dana od dana posljednjeg nastupa, a podnio je zahtjev za prelazak u drugi klub, automatski prestaje članstvo u dotadašnjem klubu. Plivač/ica kome je prestalo članstvo po odredbama stava 1. ovog člana, može da bude registrovan za novi klub samo u prvom slijedećem prijelaznom roku, nakon proteka vremena od 365 dana od posljednjeg nastupa, kada i stiće pravo nastupa za novi klub.

Član 22.

U slučaju da plivački klub prestane sa radom iz bilo kojeg razloga, plivači/ice tog kluba su slobodni da pređu u bilo koji klub van prijelaznog roka.



Kada plivač/ica mijenja mjesto boravka, odobriće se prelazak u drugi klub uz saglasnost matičnog kluba i uz dostavu dokaza o promjeni boravka-adrese stanovanja ili potvrdu o upisanoj školi na adresi novog prebivališta.

Prelazak plivača iz kluba koji se gasi moguć je po slijedećoj proceduri: Klub koji se gasi obavezan je dostaviti dokaz o gašenju/prestanku rada, klub koji se gasi obavezan je dostaviti spisak svih svojih registrovanih plivača/ica, Komisiji i njihove takmičarske legitimacije.

Član 23.

Plivači/ice koji posjeduju državljanstvo BiH, a privremeno ili stalno borave u inostranstvu duže od 6 mjeseci i nastupaju za inostrane klubove ili univerzitetske ili školske plivačke ekipe ili organizacije, imaju pravo registracije u PS BiH u skladu sa odredbama ovog Pravilnika, te nastupaju pod imenom PS BiH.

Plivači/ice koji posjeduju državljanstvo BiH, a privremeno borave u inostranstvu duže od 6 mjeseci i nastupaju za inostrane univerzitetske ili školske plivačke ekipe ili organizacije, imaju pravo zadržati registraciju za matični klub iz kojeg su otišli u inostranstvo, čime zadržavaju pravo nastupa za matični klub tokom trajanja školovanja. Klub je u tom slučaju dužan nastaviti redovno produžavati registraciju takvog člana, na način i pod uslovima propisanim ovim Pravilnikom, uz dokaz o redovnom školovanju u inostranstvu, sve dok školovanje traje.

Plivači/ice iz predhodnog stava mogu, u prijelaznom roku, promijeniti klub iz BiH, po istim uslovima koji važe za druge članove PS BiH, te nastavljaju koristiti pravo iz predhodnog stava.

Plivači/ice registrovani za klubove u BiH, osim slučajeva iz stava 2.ovog člana, ne mogu imati dvojnu registraciju i biti registrovani istovremeno i za neki inostrani klub.

Plivači koji nastupaju za druge reprezentacije, a članovi su klubova u BiH, nemaju pravo nastupa za klubove u BiH na takmičenjima koja se organizuju pod okriljem PS BiH. U tom slučaju takvi plivači/ice nastupaju na takmičenjima pod okriljem PS BiH van konkurencije (VK), nemaju pravo na plasman. Strani državljani ili oni koji posjeduju dvojno državljanstvo, a stalno borave u Bosni i Hercegovini duže od 6 mjeseci, registruju se pod istim uslovima kao i državljani Bosne i Hercegovine, uz dalje postupanje u skladu sa odredbama iz stava 5.ovog člana.

Član 24.

Eventualna obeštećenja u slučaju promjene kluba unutar PS BiH isplaćuju se samo za one takmičare koji su imali potpisani ugovor, sa ovjerenim potpisima kod notara, o saradnji s plivačkim klubom kojeg napuštaju, i takvi razlozi mogu biti opravdani u slučajevima neizdavanja ispisnice od strane kluba.

Klub koji ne poštuje odredbe ugovora iz stava 1. Ovog člana, ne može valjano osporiti izdavanje ispisnice. Dokazi kojima se dokazuje valjanost ugovora, te njegovo ispunjenje moraju biti pismeni (valjan ugovor, uplatnice, računi, ovjerene potvrde, drugi dokazi iz ugovora kojima se potvrđuje njegova konzumacija i sl).

Ovjerene kopije svih ugovora koji se sklapaju između plivača/ica i klubova moraju biti pohranjeni u Kancelariju PS BiH, u roku od 7 dana od dana sklapanja takvih ugovora. Ukoliko klubovi ne dostave ugovore koje sklapaju sa plivačima/icama Kancelariji PS BiH, pozivanje na iste neće se smatrati opravdanim razlogom za neizdavanje ispisnice.

Raskid takvih ugovora može, osim načina predviđenih ugovorom, vršiti i nadležan sud.

PS BiH priznaje raskid ugovora koji je nastao odlukom suda, ili na način predviđen ugovorom (prestankom ugovora po uslovima iz ugovora).

Član 25.

Za prelazak iz jednog kluba u drugi, klub koji prihvata na taj način novog člana, mora platiti taksu za prelaz. Taksa se plaća PS BiH, te PS F BiH ili PS RS, ukoliko je takva taksa predviđena aktima tih članica. Obveznik plaćanja takse je novi klub, koji tu obavezu, svojim internim aktima,



može prenijeti na novog člana. I u tom slučaju, novi klub je dužan prema PS BiH uplatiti odgovarajuću taksu. Visinu takse za prelazak iz kluba u klub propisuje UO PS BiH.

Odredbe o plaćanju ove takse za prelazak iz kluba u klub odnose se samo na takmičare u kategoriji kadeti/pioniri (muški 13/14, ženski 11/12), mlađi juniori/kadeti (muški 15/16, ženski 13/14), juniori/omladinci (muški 17/18, ženski 15/16 i seniori (muški 18+, ženski 16+).

PRIJELAZNE I ZAVRŠNE ODREDBE

Član 26.

Sve sporove u vezi prelaska plivača iz kluba u klub rješava organ za registraciju, kao prvostepeni organ, i Upravni odbor PS BiH kao drugostepeni organ.

Odluka Upravnog odbora je konačna.

Član 27.

Plivači/ice registrovani prije stupanja na snagu ovog Pravilnika, i posjeduju takmičarske legitimacije, ispravno su registrovani, osim u slučajevima koji su ovim Pravilnikom isključeni za mogućnost registracije.

Član 28.

Ovaj Pravilnik, kao i izmjene i dopune ovog Pravilnika, donosi UO PS BiH.

Član 29.

Slučajeve koje nisu obuhvaćeni ovim Pravilnikom, rješavaće UO PS BiH, čija je odluka konačna. Za tumačenje odredbi ovog Pravilnika nadležan je UO PS BiH.

Član 30.

Udružene članice obavezne su u roku od 60 dana uskladiti svoje pravilnike o registraciji sa ovim Pravilnikom. Ukoliko udružene članice ne izvrše usklađivanje svojih pravilnika u roku iz stava 1. ovog člana, protiv njih će se pokrenuti disciplinski postupak. Za vrijeme trajanja disciplinskog postupka, odnosno, sve dok udružena članica ne uskladi svoj pravilnik o registraciji sa ovim Pravilnikom, za sve njene članove primjenjivat će se ovaj Pravilnik. U slučaju iz stava 3. ovog člana zahtjev za sve registracione postupke članovi udruženih članice podnositi će direktno Kancelariji PS BiH. Odluke registracionog organa PS BiH i PS BiH su obavezujuće za sve članove PS BiH.

Član 31.

Stupanjem na snagu ovog Pravilnika, prestaje da važi Pravilnik o registraciji klubova i plivača u Plivačkom savezu Bosne i Hercegovine donesen 25.11.2006. godine, te svi registracioni propisi ili odredbe druge vrste, doneseni prije stupanja na snagu ovog Pravilnika.

Ovaj Pravilnik stupa na snagu danom donošenja, a primjenjivat će se od 1.03.2017. godine. Pravilnik će biti objavljen na zvaničnoj web stranici PS BiH.

Broj: 2102-001-02/17

Datum: 21.02.2017

PREDSJEDNIK PS BiH

Goran Todorović



Goran Todorović